

**TEZAU LITURGIC**  
**16 SEPTEMBRIE**

**SLUJBA**  
**SF. IERARH**  
**CIPRIAN,**  
**MITROPOLITUL**  
**MOSCOVEI**  
**ȘI ÎNTREGII RUSII**



**MOSCOVA, 2000**



# Месяца сентября в 16-й день Святителя Киприана, митрополита Киевского и всея Руси

## На великой вечерни

Поем: Блажен муж: 1-й антифон.

На Господи, воззвах: стихиры праздника 3  
и святого 5, глас 8:

На Единого Бога упование свое возложил еси, /  
сопричастен был еси Божественному житию, /  
трудами своими и любомудрием велиим /  
стяжал еси людское держание, / ревностно  
страху Божию учивый, / святителю Киприане  
достохвальне, / молися о нас ко Господу, / да  
дарует нам разрешение грехов // и велию  
милость.

Закон Божий храняше в сердце своем, / и се  
Господь изведе яко свет правду твою / и смуту  
церковную устави, / первосвятителем  
Московским ты сотвори, Киприане, / зане бо  
ревновал еси о мире / и спасении мира.

Якоже взывал еси к Петру чудотворцу: / аще  
хощеши, подаждь ми болезни исцеление, / да  
достигну твоего престола / и поклонюся  
честным твоим мощем, угодниче Спасов, /  
такожде и мы ныне вопием ти, отче Киприане, /

ведая, яко велие дерзновение имеши ко  
Господу: / помози нам и направи ны, / да  
предстанем достойни пред Престолом Божиим.  
Скорби многия претепел еси, / взем крест свой  
со смирением велиим и кротостию / и  
молитвенником за люди своя соделался еси, / на  
святительском седалище седе, святителю. /  
Непрестанно украшаеши Церковь Христову / и  
молиши Владыку и Бога своего, / всем, с верою  
к Нему притекающим, // подати мир и велию  
милость.

### Слава, глас 2:

Ныне страна Российская / о тебе хвалится и  
веселится, / имеючи тя, заступника  
непостыднаго, / якоже умолил еси Владычицу  
нашу, / спасти Царский град от нахождения  
поганых. / Образ сретя честный Богоматере / и  
облобыза, яви людем покланяющимся / и со  
слезами вопияху Тебе: // избави рабы Твоя от  
всякия беды и печали.

И ныне, праздника.

Вход. Прокимен дне и чтения:

Притчей чтение (главы 3 и 8):

Память праведнаго с похвалами, и  
благословение Господне на главе его. Блажен  
человек, иже обрете премудрость: и смертен,

иже уведете разум. Лучше бо сию куповати, нежели злата и сребра сокровища. Честнейшая же есть камней многоценных, все же честное недостойно ея есть. Долгота бо дней, и лета живота в деснице ея: в шуйце же ея богатство, и слава. От уст ея исходит правда, закон же и милость на языке носит. Послушайте убо мене, о чада! честная бо реку: и блажен человек, иже пути моя сохранит: исходи бо мои, исходи живота, уготовляется хотение от Господа. Сего ради молю вас, и предлагаю мой глас сыновом человеческим: яко аз премудрость устроих совет, и разум и смысл аз призвах. Мой совет и утверждение, мой разум, моя же крепость. Аз мене любящия люблю, ищущии же мене обрящут благодать. Разумейте убо незлобивии коварство, ненаказаннии же прилагайте сердца. Послушайте мене и паки, честная бо реку, и отверзу от устен правая: яко истине поучится гортань мой, мерзки же предо мною устны живыя. С правдою вси глаголы уст моих: ничтоже в них стропотно, ниже развращенно: Вся права суть разумевающим, и проста обретающим разум. Научу бо вас истине, да будет о Господе надежда ваша, и исполнитесь Духа.

## Премудрости Соломоновы чтение (главы 10, 6 и 9):

Уста праведнаго каплют премудрость: устне же мужей мудрых ведут благодать. Уста мудрых поучатся премудрости, правда же избавляет их от смерти. Скончавшуся мужу праведну, не погибнет надежда. Сын бо праведен раждается в живот, и во благих своих плод правды обымет. Свет праведным всегда, и от Господа обрящут благодать и славу. Язык мудрых добрая свесть, и в сердце их почиет мудрость. Любит Господь преподобныя сердца, приятни же ему вси непорочнии в пути. Мудрость Господня просвещает лице разумнаго. Постигает бо желающыя ю, прежде даже разумети ю, и удобь узрится от любящих ю. Утреневавый к ней, не утрудится, и бдяй ея ради, вскоре без печали будет. Яко достойных ея сама обходит ищущи, и во стезях ея является им благоприемне. Мудрости никогдаже одолеет злоба. Сих ради и рачитель бых доброты ея, и возлюбих ю, и в поисках от юности моя. И взысках невесту привести себе, яко всех Владыка возлюби ю. Таибница бо есть Божия хитрости, и обретательница дел Его. Труды ея суть добродетели: целомудрию же и разуму та учит, правде и мужеству, ихже потребнее ничтоже есть в житии человеком. Аще же и многого

искусства желает кто, весть древняя, и быти хотящая разсмотрит: свесть извития словес, и разрешения гаданий, знамения и чудеса проразумеет, и сбытия времен и лет; и всем советник есть благ, яко безсмертие есть в ней, и благославие во общении словес ея. Сего ради беседовах ко Господу, и помолихся Ему, и рех от всего сердца моего: Боже отцев и Господи милости, сотворивый вся словом Твоим, и мудростию Твоею устроиый человека, да владеет бывшими от Тебе тварьми, и да управляет мир в преподобии и правде. Дажь ми Твоих Престолов приседящую премудрость, и не отлучи мене от отрок Твоих, яко аз раб Твой, и сын рабыни Твоея. Посли ю с Небес от святаго жилища Твоего, и от престола славы Твоея, да сущи со мною научит мя, что благоугодно есть пред Тобою, и наставит мя в разум, и сохранит мя в славе своей. Помышления бо смертных вся боязлива, и погрешительна умышления их.

**Премудрости Соломоновы чтение  
(главы 4, 6, 7 и 2):**

Похваляему праведнику, возвеселятся людие: безсмертие бо есть память его, яко от Господа познавается и от человек, и угодна Господу душа его. Возлюбите убо, о мужие, мудрость и поживете, восхощите ея и наказани будете:

начало бо ея любви и соблюдение закона. Почтите премудрость, да во веки царствуете. Возвещу вам и не скрью от вас таин Божиих. Яко Той мудрости наставник есть, и мудрых исправитель, и всякому смыслу и делу хитрец. И всем смыслом научит мудрость: есть бо в ней дух разумен и свят, и сияние света присносущнаго, и образ благости Божия. Та други Божия и пророки устрояет. Благолепнейши же есть солнца и паче всякаго сотворения звезд, свету сосуждаема обретается первейши. Та угождающих ей от болезни избави и настави на стези правыя. Даде им разум имети свят и сохрани я от ловящих, и подвиг крепок подаде им. Да разумеют вси, яко сильнее всего есть благочестие; и никогдаже преможет злоба мудрости, ниже преидет злыя обличающа суд. Рекоша же в себе, помысливше неправедно: насильствуем праведному и не пощадим преподобства его, ни усраммимся седин старости многолетны. Будет бо нам крепость закон, и уловим праведнаго, яко неугоден нам есть, и противится делом нашим, и поносит нам отпадение закона, и обличает нам согрешения наказания нашего. Возвещает нам разум имети Божий и отрока Господня себе именует. Бысть нам на обличение помышлением нашим и тяжек нам есть, и видим, яко неподобно иным житие

его и изменены стези его. В поругание  
вменихомся ему, и удаляется от путей наших,  
яко от нечистот, и блажит последняя праведных.  
Увидим убо, аще словеса его истинна суть,  
искусим, яже сбываются ему. Руганием и мукою  
истяжем его, да разумеем кротость его, и  
искусим беззлобство его, смертью безобразною  
осудим его, будет бо посещение от словес его.  
Сия помыслиша и прельстишася: ослепи бо я  
злоба их, и не разумеша таин Божиих и не  
разсудиша, яко Ты еси Бог Един, живота имеяй  
и смерти власть, и спасаая во время скорби, и  
избавляяй от всякаго зла. Щедр и милостив, и  
даяй преподобным Своим благодать, и Своею  
мышцею гордым противляяйся.

### На литии стихиры, глас 3:

Добрый рабе, благий и верный, / ревностный  
труженниче Христовы нивы, / источниче  
милости неиссякаемый, / наставниче верных  
Богомудрый, / святителю Христов Киприане, /  
даруй скорбящим утешение, / подай страстей  
исцеление, / вразуми неверныя люди, / да  
восславят Христа Бога, / моли Ему непрестанно  
о всех нас, // чтущих ныне святую память твою.

### Слава, глас 4:

Празднуем тебе ныне во храме сем, / храмом  
себе Господа соделавша / очищением сердца

своего от скверны / и Христа ради гонения претерпев, / смирение высокое показа, // и ныне неувядаемым венцем увязлся еси.

**И ныне, праздника.**

**На стиховне стихиры, глас 2:**

**Д**несь красуется и веселится / царственный град Москва, / иже приемый добраго пастыря, / святою верою назидающаго себе и люди / и Духом Святым молящагося, / в любви Божией паству свою соблюдающаго, / чающаго милости Господа и жизни вечныя. / Приидите ныне, праведника воспойте, / святителя мудраго восхвалите / и предстателя за ны молитесь / о мире и спасении душ наших.

**Стих:** Блаженни живущии в дому Твоем / в веки веков восхвалят Тя (Пс. 83:5).

**П**ремудростию словес твоих, / Киприане приснославный, / уверил еси маловерныя, / и сердца верных возрадовал еси. / Ныне воспойм тя, Христова святителя, / Церкви утверждение, архиереев похвалу, / священников славу, мирян утешение. / Темже ти убо взываем: / молися о спасении душ наших.

**Стих:** Близ боящихся его спасение его, / вселити славу в землю нашу (Пс. 84:10).

**Р**адуйся, слепых наставниче, / немощных крепкий заступниче, / своим вещанием

укрепльавшаго вои, / молящагося Владычице со  
слезами, / о спасении верных и поганых  
поражении. / И ныне Христа умоли / Отечество  
наше укрепити, / в единении люди сохранить /  
и веру правую утвердити, / да возможем  
праздновати светоносное твое преставление.

**Слава, глас 8:**

Благочестно последовал еси Христу, / усекнув  
плотское мудрование воздержанием, / на  
Святей Горе подвизавыйся, / святителю  
Христов Киприане, / столпе и утверждение  
Церкви Русския, / непрестанное Ея украшение,  
/ вонми гласу моления нашего, / буди нам  
заступник крепкий / и молитвенник  
изряднейший пред Господем // да помилует нас  
и всякия скорби избавит.

**И ныне, праздника.**

**Тропарь, глас 4:**

Православия учителю, / просвещения  
ревнителю, / красото болгарския страны / и  
Руси достославный светильниче, / святителю  
отче наш Киприане, / моли Христа Бога //  
сохранити нам веру до скончания века.

**Ин тропарь, глас 4:**

Иже от Бога свыше Божественною благодатию  
совершен / и благими нравы украшен, / Духом  
Святым просвещен, / совершив святыню в

страсе Божии, / сподоблен бысть благодати  
Божественнаго Духа, / пасый Церковь Божию  
Русския митрополии, / постом вся поборая,  
волнение претерпе, гонение преминув, / святаго  
Петра митрополита всегда себе в помощь  
призывая, / и сего помощника имея, / и того  
стопам последуя. / Служитель благоприятный, /  
заповеди Божия соблюдая, Духом Божиим  
наставляемъ, / просвещая верныя люди учением  
словес твоих, / пощением украси житие свое, /  
ярем Господень измлада восприим, / и паче всех  
Христа возлюби. / Того ради и архиерейским  
седалищем почтен, / и, яко светозарное солнце,  
от Сербския земли произшед, / и по вся концы  
русския земли добродетелию просияв, / светило  
явися миру, / и преставися ко Господу от сея  
жизни в вечный покой, / великий архиерею  
Божий, Киприане митрополите, / учителю и  
наставниче Русския земли, / всегда предстоя  
Престолу Пресвятыя Троицы, / моли Господа  
прилежно / об архиереях и о всех христианах,  
// да спасет тебе ради души наша.

### **На утрени**

**На Бог Господь: тропарь праздника, дважды.  
Слава, тропарь святителя, и ныне, тропарь  
праздника.**

**По 1-м стихословии седален, глас 1:**

Паству свою мрежею слова от неразумия  
отженил еси, / и заблудшия просвещая  
Божественною благодатию, / яко Христовы  
апостолы человеки к Богу привел еси. /  
Добродетелей на высоту возшед, славне  
Киприане, / темже яко друга ты ближняго  
Христова ублажаем, / слава светоносную и  
святую память твою.

**Слава, и ныне, праздника.**

**По 2-м стихословии седален, глас 4:**

Измлада разум имел еси непорочен / и,  
Божественный глас восприимше, /  
воспроповедал еси прилежно, святителю. /  
Присно верныя доброучительствова и ко Христу  
приводя, / архиерействовал богоугодно еси,  
преподобне.

**Слава, и ныне, праздника.**

**Величание:**

Величаем ты, / святителю отче Киприане, / и  
чтим святую память твою, / ты бо молиши за  
нас // Христа Бога нашего.

**Псалом избранный:**

Услышите сия, вси языцы, внушите вси,  
живущие по вселенней.

Уста моя возглаголют премудрость, и поучение

сердца моего разум.

Приидите, чада, послушайте мене, страху  
Господню научу вас.

Благовестих правду в церкви велицей. Истину  
Твою и спасение Твое рех.

Повем Имя Твое братии моей, посреде церкви  
воспою Тя. Услышати ми глас хвалы Твоея и  
поведати вся чудеса Твоя.

Господи, возлюбих благолепие дому Твоего, и  
место селения славы Твоея.

Возненавидех церковь лукавнующих, и с  
нечестивыми не сяду.

Яко сохраних пути Господни и не нечествовах от  
Бога моего.

Уста праведнаго поучатся премудрости, и язык  
его возглаголет суд.

Правда Его пребывает в век века.

Священницы Твои оденутся правдою, и  
преподобнии Твои возрадуются.

Блажени живущии в дому Твоем, в веки веков  
восхвалят Тя.

#### По полиелеи седален, глас 4:

Пристанище спасительное показался еси,  
блаженне, / и сосуд богоизбранный, благодать  
изливающий, яко миро, / дарствующее верным  
гобзование щедрот. / Воспеваем тя ныне,  
святителю чудный, / нищих заступниче и

исцелений подателю, / и молим ти ся: / поминай  
вся, поющыя тя, Киприане.

Слава, и ныне, праздника.

Степенна 1-й антифон 4-го гласа.

Прокимен, глас 4: Яко Бог судия есть: / сего  
смирят, и сего возносит (Пс. 74:8).

Стих: Вся роги грешных сломлю, и вознесется  
рог праведнаго (Пс. 74:11).

Всякое дыхание: Евангелие от Иоанна, зачало  
36:

Рече Господь ко пришедшим к Нему иудеем: Аз  
есмы дверь, Мною аще кто внидет, спасется, и  
внидет, и изыдет, и пажить обрящет. Тать не  
приходит, разве да украдет, и убиет, и погубит,  
Аз приидох, да живот имут и лишше имут. Аз  
есмы пастырь добрый, пастырь добрый душу  
свою полагает за овцы. А наемник, иже несть  
пастырь, емуже не суть овцы своя, видит волка  
грядуща и оставляет овцы, и бегает, и волк  
расхитит их, и распудит овцы. А наемник  
бежит, яко наемник есть и нерадит о овцах. Аз  
есмы пастырь добрый, и знаю Моя, и знают Мя  
Моя. Якоже знает Мя Отец, и Аз знаю Отца, и  
душу Мою полагаю за овцы. И ины овцы имам,  
яже не суть от двора сего, и тыя Ми подобает

привести, и глас Мой услышат, и будет едино стадо, и един Пастырь.

**По 50-м псалме стихира, глас 6:**

Благочестия истинный проповедниче, / Церкви православныя светолитие, / святче Христов многочудный, / святителю отче наш Киприане, / ты ныне песньми похвальными почтим, / да твоими молитвами исправимся, / и ко Господу с упованием возопиим: // спаси души наша.

**Канон праздника со ирмосом, на 6,  
и святителя, на 8.**

**Канон святителя Киприана, егоже краегранесие по алфавиту. Глас 6.**

**Песнь 1.**

**Ирмос:** Яко по суху пешешествовав Израиль, / по бездне стопами, / гонителя фараона / видя потопляема, / Богу победную песнь / поим, вопияше.

Ангелогласен явился еси, святителю, / воспевая Христа Бога и Его Пречистую Матерь, / наветы вражеския отгоняя твоими молитвами, Киприане.

Благовестителей доброе наследие восприял еси, / и, искапая из устен твоих сладость Божественную, / напоил еси верных питием

правды и добродетели.

**В**озсиял еси яко солнце полуденное, святителю Божий, / и светом своим тьмы врагов просветил еси, / Отечества нашего ради спасения и поганых поражения.

**Богородичен:** Грозу сопостатов и верных Заступницу / ныне согласно восхваляют небо и земля, вопиюще: / радуйся, Бога Родительнице и Хранительнице жизни нашея.

### Песнь 3.

**Ирмос:** Несть свят, / якоже Ты, Господи Боже мой, / вознесый рог верных Твоих, Блаже, / и утвердивый нас на камени / исповедания Твоего.

**Д**ушеводче и святителю Киприане Богозванный, / на первосвятительства стязи многия приборствова преткновения, / последи же за терпение твое и молитвы богопочтенен быв.

**Е**вангельския истины учитель и истый Христу подражатель быв / ко Владыце всяческих привел еси человецы мнози. / Темже проповедника тя правды и друга Христова вси именуем.

**Ж**атву убо многу имел еси, святителю, / и делателем ревностным соделался еси, просвещая ю. / Се ныне молитвами твоими спасай нас, / яко твое есмы стадо и новая жатва.

**Богородичен:** Звезд большая и светлейшая еси, Луно, / Херувимов и Серафимов превышшая еси, Богородице, / Солнце правды прияла еси в Твоем чреве, Невместимаго Бога. / Темже Тя вси вернии песньми ублажаем.

### Седален, глас 5:

Путем Божеству подобенства верно ходил еси, / прелесть лукавую попяля и прилоги врагов отбегая, / верныя просветил еси, сыном Света являя ся, / лучами словес поведая славу Небесную, Киприане богоблаженне.

### Песнь 4.

**Ирмос:** Христос моя сила, / Бог и Господь, честная Церковь / боголепно поет, взывающи / от смысла чиста, о Господе празднующи.

Запаление страстей угасил еси, преподобне, / умертвив плотское мудрование воздержанием. / Се ныне со ангели и архангели радуящися ликуеши, / мы же тебе смиренно просим молитися ко Господу / о грехов оставлении и спасении душ наших.

Исполнен сый благодати и разума Божия, / Егоже ради, яко солнце просиял еси, просвещая верных, / и Христа величал еси делами твоими, чудне. / Кто тя достойно восхвалит, святителей украшение и похвало?

Иераршаго служения образ достойный явился еси, / преподобен, незлобив, безскверен, якоже речено, / и своим предстательством верныя ограждаеши, Киприане святителю, / истинный защитниче и молитвенниче изряднейший пред Господем.

**Богородичен:** Кореню девства и цвете чистоты неувядаемый, / Владычице державная и Заступнице сирых, / воспеваем и славословим Тя ныне и во вся дни, / Тобою бо прииде всему миру Спасение.

### Песнь 5.

**Ирмос:** Божиим / светом Твоим, Блаже, / утренюющих Ти души / любовью озари, молюся, / Тя ведети, Слове Божий, / истиннаго Бога, / от мрака греховнаго взывающа.

Любви Божией неразлучен быв даже по смерти, / благодатию обогащен и светом Вышняго озаряемь, святителю, / узрел еси неизреченную славу в Троице сущаго Бога / и ангельски ныне песненно Господа хвалиши.

Мрака языческаго не убояся, блаженне, / но молитвами твоими озарилися суть тьмы сопостатов. / Такожде и ныне верных можеши спасти, / моля Владыку всяческих очистити и просветити души наша.

Наветы и гонения смиренно терпяше, / и о

досаждающих тя моляше непрестанно,  
Киприане, / яко Господь тебе бе помощник и не  
убоялся еси, / но благодаря, приял еси крест  
свой и служение Церкви, / да воспрославится  
имя Господне до века.

**Богородичен:** Огнесиянием Твоего образа,  
Пречистая, / благословися престольный град, /  
и молитвами Твоими грешницы к покаянию  
приведошася и разумению, / яко Владыце всех  
молиша о спасении и жизни вечней.

### Песнь 6.

**Ирмос:** Житейское море, / воздвигаемое зря  
напастей бурю, / к тихому пристанищу Твоему  
притек, вопию Ти: / возведи от тли живот мой, /  
Многомилостиве.

Пастырю истинному и предобрейшему  
соображаяся, Киприане, / путевождем явился  
еси полезнствующим ко спасительному  
пристанищу, / вразумляя, просвещая, даруя  
надежду и упокоение.

Радуйтесь, вернии, и взыграйте, / яко имате  
скорого себе помощника на небесех / и в бедах  
крепкаго предстателя немощствующим, /  
молящася Христу Богу присно о всех нас.

Светонаставника тя, Киприане, именуем, / яко  
возлюбил еси селения Господни и в них вселился  
еси, / ныне же в сердца верных к Свету стези

полагаеши, / да возвеселятся и прославят имя  
Господне.

**Богородичен:** Таинства страннаго и преславнаго  
Содетельницу Деву воспеваем, / яко  
Пресущественнаго родила еси Святым Духом, /  
и Сына Твоего жертвы крестныя Свидетельницу  
превозносим, / яко Приносящаго и Приносимаго  
во утробе восприяла еси.

### Кондак, глас 6:

Святителю Христов, пастырю добрый, / учителю  
Небесныя мудрости, / светильниче света  
духовнаго, / Киприане досточудне, / не престай  
молитися за паству свою, / за любящих и  
чтущих тя, // града нашего крепкий  
заступниче.

### Икос:

Необоримь столп Православия, / вере Христовой  
утверждение, / церквам украститель, премудрый  
учитель, / сербское воспитание, русское  
процветение, / Господнею любовью распалаемь.  
/ Духу Пресвятому дом явися, / и душу, яко  
жертву непорочну, Господеви принесе, /  
досточудне и всечестне Киприане, святителю  
Христов, / сего ради вселися в широту райскую,  
/ предстоя Христу в лице святых, / Емуже  
молися и спасай град и люди от поганых

нахождения, яко да зовем ти: // радуйся, отче Киприане, учителю премудрый.

### Песнь 7.

**Ирмос:** Росодательну убо пещь / содела Ангел / преподобным отроком, / халдеи же опаляющее / веление Божие, / мучителя увеща вопити: / благословен еси, Боже отец наших.

Удобоувядаемаго мира отлучился еси с юности / и на Святей горе вселился еси, молитвенниче, / с преподобными и праведными увеща непрестанно: / Богу нашему пойте и радуйтесь пред Ним.

Фелонию обличен благодати Христовы и митрою истины, / зане еси ты похвала Его, Киприане, и слава, / и со святители милость Его и спасение возвещаеши, вопия: / Богу нашему пойте и радуйтесь пред Ним.

Хвалебныя песни Богови воспеваеши, святителю, / с лица ангелов и архангелов купно глаголя: / Господь наш есть Бог, творяй чудеса, / люди Своя яко овцы наставляяй, / Богу нашему пойте и радуйтесь пред Ним.

**Богородичен:** Царицу Небесную вси восхвалим, / якоже палата бысть всех Царя и Владыки, / восхотевша и победивша естества уставы. / Ныне же чудяхуся восклицаем: / Богу нашему пойте и радуйтесь пред Ним.

## Песнь 8.

**Ирмос:** Из пламене преподобным росу источил еси / и праведнаго жертву водою попалил еси: / вся бо твориши, Христе, токмо еже хотети. / Тя превозносим во вся веки.

**Ч**удодетеля Христа истиннаго сподвижника тя почитаем, / живот свой предавша Владыце всех и Богу святителя, / славою и честью увенчавшася, и вопием: / о спасении Твоем возрадуемся и превозносим Тя во вся веки.

**Ш**естокрилатым подражая песнь победную припеваеши, святителю: / Свят, Свят, Свят Господь Бог Вседержитель, Иже бе и Сый и Грядый. / Тому умильно глаголем: избави нас от всякия скверны, / о спасении Твоем возрадуемся и превозносим Тя во вся веки.

**Щ**едролюбца Христа ревнитель явился еси, / по вся концы земли Русския добродетелию просияв, / егоже молитвами, Боже, благодетельствуеши нам непрестанно, / мы же согласно Тебе воспеваем: / о спасении Твоем возрадуемся и превозносим Тя во вся веки.

**Богородичен:** Юноту юнот и Юницу юниц чистейшую величаем, / яко Девая родила еси Бога, / сокрушивша смерть и рая двери отверзивша нам, / и к Нему возопием: / о спасении Твоем возрадуемся и превозносим Тя во вся веки.

## Песнь 9.

**Ирмос:** Бога / человеком невозможно видети, /  
на Негоже не смеют чини Ангельстии взирати; /  
Тобою же, Всечистая, явися человеком / Слово  
Воплощенно, / Егоже величающе, / с небесными  
вои Тя ублажаем.

Яко изрядный Владыце подобник, / учитель  
дивный премудрости и истины показался еси, /  
прилежно научение книжное стяжав / и людям  
верным живот во благочестии показуя. / Сего  
ради тя ублажаем.

Псаломски в себе глагола: / да скончается злоба  
грешных, и исправиши праведнаго, / и обидиму  
бе, благословляше тя досаждающих. /  
Терпением твоим стяжал еси Божественную  
благодать. / Сего ради тя ублажаем.

Фаворскою славою Господнею осененный, / яко  
иго Христово взем, добре понесл еси, Киприане,  
/ и зеркало светлое и теплый молитвенник  
стране Российстей явился еси. / Сего ради тя  
ублажаем.

**Богородичен:** Ипостасное Слово Божие  
вместившую славословим / и песнь умильную  
приносим Ти, Владычице, / не оскудевай  
благодатною Твоею помощью, / на верных люди  
Твоя, зовущия: / радуйся, смертных к Богу  
дерзновение, радуйся, Невесто невестная.

## Светилен:

Славно спразднуем днесь светозарное торжество, яко во свете славы лица Божия предстоиши, святителю отче наш Киприане, помяни нас, хвалящих твою память.

Слава, и ныне, праздника.

## Стихиры на хвалитех, глас 4:

Народи боголюбивии, / приидите ныне, премудраго иерарха восхвалим / и песньми почтим изряднаго ученика Христова, / истиннаго учителя и наставника нам, / просвещающа и освящающа верных сердца // учением словес своих и молитвами.

Людие многочисленнии / днесь собращася славити Христа / и его вернаго поспешника и друга, / иже бе избран православных пастырем / и врагов поганых отгнал еси, яко волки. / Ныне же, предстоя пред лицом Господа, / заступи паству твою словесных овец // и молися, лютых избавляя ны.

Днесь веселием исполним наша сердца, / совершающе честную память твою, / блаженне отче Киприане, / егда бо агаряны восхотеша погубити христоименитое людство, / бысть яко столп светлый новому Израилю предводяща / и святительским взыванием его воинство укрепил еси. / Ныне же с небеси призри на чтущия тя,

// да твоим молением мир приобретаем, о Христе Иисусе, Господе нашем.

**Слава, глас 6:**

Великаго во святителех ныне поем, / благодатию призванного бескровную совершати жертву, / яко непорочен явился еси, служа Богу, / егоже ученьми ояденевшая сердца утеплишася, / достоин явися угодник Вседержителя, // молится о душах наших.

### **На Литургии**

Блаженна от канона праздника песнь 3-я и канона святого песнь 6-я.

Прокимен, глас 1: Уста моя возглаголют премудрость, / и поучение сердца моего разум. Стих: Услышите сия вси языцы, внушите вси живущии по вселенней.

Апостол ко Евреем, зачало 318А (7:26-8:6).

Аллилуиа, глас 2: Уста праведнаго поучатся премудрости, и язык его возглаголет суд. Стих: Закон Бога его в сердце его, и не запнутся стопы его.

Евангелие от Луки, зачало 24 (6:17-23А). Конец:

Се бо мзда ваша многа на небеси.

Причастен: В память вечную будет праведник: